

Ti xroon yóxin chr'éhen Pablo ti sin

Corintio

Nixjehe Pablo ti sin Corintio

1 ¹*Janhan Pablo, Díos kjueyá ti janhan kixin sít'aha Ìnchéni Jesucristo ixra, la ko kíchóni Timoteo ikjian ti xroon i chr'ahánra jahara tjejora nínkué Díos itjen chjasin Corinto la ko kaín ti íso sin kíchóni tinkáchónki Díos tjejó Acaya. ²Kjuasáye It'éni Díos la ko Ìnchéni Jesucristo chrókjuintañaora la ko chrótjáhara kjuaxróxin.

Ti kjuasóte ch'in Pablo

³Chjéheni kjuasáya Díos, It'é Ìnchéni Jesucristo kixin jehe ch'an mé tìkonoéhe ch'an ti jeheni la ko tjajon ch'an kjuachéhe nkochríxín. ⁴Jehe ch'an mé tjinkítsa ch'an ti jeheni ti ó itsi ijnko nkehe náxrjónhña ts'atsínkani kixin kjaxini tsjachani tsjinkítsani íso sin ti ó ts'atsínka sin nkojín nkehe náxrjónhña éxi jehe ch'an kjuínkítsa ch'an ti jeheni. ⁵Mé xíkaha tjejótjasóteni

éxi kjuasóte Cristo la kjaxin Díos imá tsjinkítsa ti jeheni kixin tinkáchónkini Cristo. ⁶Tjejótjasóteni kixin jahara la kjuaxróxin chrók'uejora la ko chróchontara kjuachón nkochríxín. Díos tjinkítsa ti jeheni kixin kjaxin jeheni jína chrókjuinkítsani ti jahara kixin chrókjuachara kjónté chrókjuasótexínra éxi tjejótjasóteni. ⁷Ó noheni kixin chaxín tinkachónkira Díos la ko noheni kixin tjejotjasótiara éxi jeheni tjejótjasóteni, la Díos sinchechéhe ti jahara éxi nchechéhe ch'an ti jeheni. ⁸*Jahara kíchóni, tjinkaoni kixin tsonohara kixin imá kjuasóteni ti k'uejoni Asia. La imá náxrjónhña kóheni la í chrókjuachahyani, la kjuénkayáxini kixin í chrókjanhñani ntihi, ntahó chrók'uexíní. ⁹Kónoheni kixin ntahó chrók'uexíní, kjánchó xíkaha kóhen kixin chrók'uitjani antsí chrókuitekaoni Díos, ti nkexro tjacha nchexechón

chojni tsík'en, kixin ti jehóni la chrókjuachahyani. ¹⁰Díos mé kjuínkĩtsa ti jeheni kixin siín nchónhña nkehe chrók'uenxíni. Méxra ó noheni kixin chaxín naxa tsjinkĩtsa ch'an la ko ts'ayakohen ch'an ti jeheni. ¹¹Méxra tjínkĩtsara nixjehéra Díos kixin tsjinkĩtsa ch'an ti jeheni. Andá ti itsjé chojni chrókjuanchehe Díos kixin tsjinkĩtsa ti jeheni, ndá chr'éxín la itsjé chojni tsochjéhe sin Díos kjuasáya kixin chaxín kjuínkĩtsa ch'an ti jeheni.

**Nkekuènté sákjuihya
Pablo Corinto**

¹²Chéheni kixin noheni ndoá k'uéjoni ntihi chjasintajni la kjuích'iyehyani ninkexró, la xíkaha jína k'uejókoni ti jahara. La jehya kjuachaxin kuènténi ndá kjuachani tíha. Náhí. Ti kjuachaxin kuènté Díos mé kjuínkĩtsa ti jeheni la jína k'uéjoni. ¹³Andá ijie ichr'án ti xroon í, la kjinhña nkehe chrókiénxinhñara. Ikjian ti nkehe antsí xrahya kixin chrókjuacha chrókjuínchekuáxinra la ko chrókiénxinra. Tjínkaosan kixin chrókiénxinra kaín tíhi jína. ¹⁴Andá ijie ó tinkakiénxinra intsí, ndá xíkaha ti ó tsokjan Ìnchéni Jesús la tsocháhara kixin jína kjuakoni la ko kjaxin jeheni tsochéheni kixin jahara jína kuitekáonra.

¹⁵Mé xíkaha kjuénkayáxian kixin sao chrókjuasántsjahára ndá xíkaha chrókócháhara kixin yàya chrókjuasán ti tjejora. ¹⁶*Kjuenkayáxian kixin chrókjuasántsjahára sao ti ó sáchrókjuia Macedonia la ko chrókjuasántsjahára inaá ti ó chrókjanxian ntiha. Ndá xíkaha chrókjuínkĩtsara ti janhan ti ó sáchrókjuia Judea. ¹⁷¿Á tjénkayáxinra kixin nduáhya kjuénkayáxian janhan ti ó ndáxrjan senó kixin chrókjuasán ntiha ní? O, ¿á tjénkayáxinra kixin níxja éxi ijnko chojni tinkáchónkihiya Díos kixin sao chróndáxrjan, jeén tsjasán, ndá chr'éxín la náhi ní? Ti xíkaha la nduáhya tjénkayáxinra. ¹⁸Díos la tjetsjehe kixin jehya ndáxrjan jeén, ndá chr'éxín la náhi ¹⁹*kixin ti xjeen Díos, Ìnchéni Jesucristo ti nkexro kjuakoxin Silvano, Timoteo la ko janhan ti k'uéjoni ntiha, la xíkahnña k'uéndáchro ch'an, kjuích'iyahya ch'an ninkehó. Kaín ti nkehe ndáchro ch'an la chaxín xiteyá. ²⁰Kixin kaín ti nkehe tsíchronka Díos la mé Cristo kjuínchexiteyá. Mé xíkaha ti ó chjéheni Díos kjuasáya la mé ndáchroni “Mé xíkaha tsohen”, kixin ti kjuachaxin ijie kuènté Cristo Jesús. ²¹Díos mé kjuínkĩtsa ti jeheni la ko ti jahara kixin kaíni jína chrókuínkáchónkini Cristo la Díos mé nchetjóá ti

jeheni ²²ko kjuakoxin ch'an kixin kuènté ch'an ti jeheni la kjuajon ch'an ijnko xroye, mé ti Nchakuén ch'an kixin tsonoexíni kixin chaxín ts'áyeheni ti nkehe tsjajon ch'an chr'éxin.

²³Andá ti naxa kjuasánhya Corinto éxi kjuénkayáxian la Díos la tjetsjehe kixin kjuasánhya kixin tjínkakhonña chrókóxakohanra kixin chrókuenduáhara ínaá. ²⁴Jehya kixin chrókuétuahanra kixin chrókuinkachónkira Ínchéni kixin ó nona kixin ndoá tinkachónkira ch'an. Méxra tjínkaoan tsjinkitsa ti jahara kixin antsí chrókócháhara.

2 ¹Mé xikaha kjuénkayáxian kixin naxa chrókjuasánhya, kixin ti tsjasán la sintak'avára. ²Andá ti chrókujintak'avára la, ¿xá nkexro chrókjuinchechéhe ti janhan? Kixin jehó ti nkexro kjujintak'avá mé sinchechéhe ti janhan. ³Mé xikaha ikjian ti xroon chr'ahánra senó kixin tjínkakhonña chrókjuasán ndá chrókjuínchek'avára asená ínaá. Náhí. Jahara chrókjuinchechéhéra ti asená. La ó nona kixin ti chàna la kjaxinra tsocháhara. ⁴Ti ó ikjian ti xroon chr'ahánra senó la imá kóxakóna la ko tsjanaka. Kjánchó jehya ikjian ti xroon a, kixin chrókjujintak'avára. Ikjian ti xroon kixin chrókónohara kixin imá tjuahára.

Pablo k'uitjáñehen ti ijie kjuasin ijnko nkexro

⁵Ti nkójín nkexro kjuínchek'avána la jehya janhuán kjuínchek'avá sin. Náhí. Kaínra kjuínchek'avá sin. Kjánchó tjínkakhonña imá sintasatáha ch'an. ⁶Ó nchoxon ti kjuínchekjasótera ch'an kaínra kixin í tsjasinhña ch'an ijie. ⁷Andá ijie la chrók'uitjáñahanra ti ijie kjuasin ch'an, la chrókjuínkitsara ch'an; ti náhí, la tsonéxin ch'an ti kjuat'avá. ⁸Méxra xrjanoáhara kixin chrókjuákoxinra ínaá kixin chaxín tjuéhéra ch'an. ⁹Ti xroon chr'ahánra sao la ikjian kixin tsonona á chaxín sinchexiteyára kaín ti nkehe tétuahanra. ¹⁰Andá ti ts'itjáñahanra ichrén ijie kjuasin ijnko chojni, la kjaxin janhan ts'itjáñana ti ijie. Ti chaxín síin ichrén ijie chrók'uitjáñana, la kjuachaxien Cristo la tsjin kaín ti ijie kjuasin sin kixin jína chrók'uejora. ¹¹Ndá xikaha tsjachahya ti Jínahña sich'iyehé ti jeheni, kixin ó noheni kixin ti Jínahña la imá ch'ia.

Ti kjuaxikaon kóchóna Pablo ti kjuák'e Troas

¹²*Ti ó kjuasán ti chjasin Troas chrókjuákua ti itan nixin kuènté Cristo la kónona kixin antsí síin kjuachaxin chrókóhen ixra

kuènté Ìnchéni ntiha. ¹³Kjánchó náxrxjónhña kjuák'e asená kixin k'uitjáhya ti kíchóni Tito. Méxra tuénxín nixjahá ti sin tjejó ntiha la sákjuia Macedonia.

Pablo chjéhe kjuasáya Díos

¹⁴Kjuasáye Díos kixin tjinkitsa kixin jína tsochóntani ti kjuachaxin kuènté Cristo Jesús. Ndá xikaha sátsjini nkuíxín chrónkaxíni ti itan kuènté Díos éxi ijnko nkehe xraxé náxrxjón chrókóxríhín kaín chojni. ¹⁵Kixin kaíni mé éxi ti nkehe xraxé náxrxjón tjajon Cristo t'áyéhe Díos, la ti xraxé mé sáti ti síin ti chojni tsaá la ko kjaxin ti síin ti chojni ts'itjáña. ¹⁶Ti chojni ts'itjáña la ti xraxé la éxi ijnko nkehe ts'itjáñaxín sin xikaha. Andá ti chojni tsaá la ijnko nkehe tjajon kjuachón t́ha. Méxra, ¿xá nkexro chrókjuacha kixin jína chrókjuích'e ti ixra i? ¹⁷Nkojín sin la tjako ti itén Díos kixin tjinkaon sin chrókjuacha sin itsjé chichaon, andá jeheni xikahña ich'eni. Díos la tjetsjehe kixin kaín aséni tjakoni ti itén ch'an kixin kjueyá ch'an ti jeheni kixin sich'ehe ni ixra ti xjeen ch'an Jesucristo.

Ti kjuachaxin nixin

3 ¹¿Á tsjankíxini tsochronkani inaá kixin jínani ní? O, ¿á ticháxin

chrókjuíjikoni ijnko xroon tsíkjin chojni kixin tsonoaxínra kixin ijnko nkexro jína ti jeheni ní? ¿Xá ticháxin chrókjuanchahara ijnko xroon kixin tsochronka kixin jínani éxi tjanchia íso sin ní? ²Náhí. Ticháxiénhñani nijnko xroon kixin jahara mé éxi ijnko xroon tsíkjin, kixin kaín chojni tsochóxixín la ko sinchekuáxin kixin xikaha tsonoexín sin kixin jeheni mé ch'ehe ni ixra Cristo. ³*Noxín t'íkon sin kixin jahara mé éxi ijnko xroon tsíkjin Cristo kixin t'íkon chojni ti ixra kjuích'eni. Kjánchó jehya ndahni^a tsík'ónaxín. Náhí. Ti Nchakuén Díos tjechón mé tsík'ónaxín. La ko kjaxin jehya ixro tabla tsíkjin ch'an t́ha. Tíha la asén chojni tsíkjin ch'an.

⁴Méxra titekaoni Díos kixin ti xjeen ch'an, Jesucristo, la noexíni kixin chaxín t́ha. ⁵Jehya kixin ó jehí chróchóntani kjuachaxin kixin chrókjuích'eni ti ixra. Náhí. Kaín ti ixra tjejóch'eni la Díos tjajon kjuachaxin. ⁶*Díos mé kjuajon kjuachaxin kixin chrókjuích'eni ixra, tsochenkani chojni ti itan nixin. Tíhi la jehya ijnko nkehe tsíkjin chojni ndá nchexiteyéhe ni. Náhí. Tíha mé kjuajon ti Nchakuén Díos. Ti ley tsíkjin chojni mé tjikao ti its'en chojni, andá ti Nchakuén Díos la tjajon kjuachón nkochríxín.

^a 3:3 ndahni ndahni kixín chojni xroon tinta para escribir

3:3 a: Ex. 24:12; b: Jer. 31:33; Ez. 11:19; 36:26. 3:6: Jer. 31:31.

⁷*Ti ó xrájon ti ley tsík'óna ixrə tabla, la kjuikəo ti its'en chojni kixin ti nkexro tsitekakonhña ti ley la its'en, la kjónté tíha k'uéchónta kjuachaxin kixin ti sin israelita la xrokuahya komá sin nkayakon Moisés kixin imá tjákini tsjehe. Kjánchó ti tjákini la tjoka k'uitjáña tíha. ⁸Andá ti xíkaha kóhen ti ñəo a la, çá jehya ijnko xrohi əntsí imá t'inkasəñaxín tjikəo ti Nchəkuén Díos ní? ⁹Mé xíkaha ti ley k'uéchónta kjuachaxin ijie kjónté kjuikəo ti its'en chojni, andá ti itan jína chrónka Díos la əntsí chóna kjuachaxin. ¹⁰Méxra ti kjuachaxin k'uéchónta ti ley kuék'etəo əsə la ninkehó tóyoəhya ti kjuachaxin itjen ijie. ¹¹Ti k'uéchónta kjuachaxin ti nkehe séhyó kjuák'e ndá k'uitjáña, andá əntsí chóna kjuachaxin ti nkehe tsjak'e nkochrín.

¹²Mé xíkaha tjejóchóheni ti nkehe tsjehya, la chrakonhani chronaxíni kaín tíha.

¹³*Ch'ehyani éxi kjuích'e ch'in Moisés, k'uekjəxín ch'an ika ti nkayakon ch'an kixin tsonoehña ti sin israelita kixin ó tinkák'itjáña ti tjákini chóna ti nkayakon ch'an. ¹⁴Kjánchó jehe sin naxə kienxínhña sin la ko naxə xíkaha tjejó sin ijie ti ó nchekuáxin sin ti ley k'uáyéhe Moisés, kixin ti ika

la naxə tjenkakuəxín ti ikon sin la naxə tienxínhña sin. Andá ti chrókuinkáchónki sin Cristo, la chrókujuin ti ika tjenkákóhen ti nkayakon sin. ¹⁵Andá ijie ti ó nchekuáxin sin ti xroon tsíkjin Moisés la éxi naxə tjenkákóhen ijnko ika, kixin tienxínhña sin. ¹⁶*Andá ti ó ijnko chojni tsjankíxin tsinkáchónki Jesucristo la ti ika tjenkákóhen la tsjin. ¹⁷İnchéni mé Nchəkuén Díos. La ti itjen ti Nchəkuén Díos la ntiha kohya nkehe ts'inkákonhen. ¹⁸Andá kaíni kohya nkehe tjenkákóhen nkayakoni la jeheni éxi ijnko xrosəntə tjákini ti kjuachaxin kuənté İnchéni Jesucristo, la tinkák'ixitóxín ti kjuaxrexinkaon kuənténi kixin chrókóyoəheni éxi jehe ch'an kixin əntsí tsochóntani ti kjuachaxin kuənté ch'an. Tíhi mé ti ixrə tjech'e İnchéni, la ko ti Nchəkuén ch'an.

Tsochrónkani ti itan kuənté İnchéni Jesucristo

4 ¹Díos la kuikonoéhe ch'an ti jeheni la kjuajon ch'an kjuachaxin sich'eni ti ixrə i, méxra chrók'óxrjəhyani. ²Icha jína chrókotjinkakonhñani kaín ti nkehe tjikəo kjuatosuéhe la ko ti nkehe imó; ch'iyehyani chojni, tjinkíhyani ti nkehe chóna xroon itén Díos. Díos la tjetsjehe kixin ndoá chrónkani kaín nkehe. Mé xíkaha kaín chojni

chrókónohe kixin jína tjakoxini.

³Jeheni tjakoni ti itan nixin, kjánchó iso sin, kjónté xikaha tihin sin la tienxínhña sin, kixin ó tsíkixién sin ts'itjáña sin.

⁴Ti Jínahña mé nchek'ikohñña ti jehe sin, kixin xrokuahya chrók'uikon sin ti xrohi kuénté ti itan nixin kuénté Cristo, kixin Cristo mé chóna kjuachaxin éxi Díos. ⁵Ti ó tjakoni la jehya tjakoni kixin chrókuitekáonra ti jeheni. Tjakoni kixin chrókuitekáonra Ìnchéni Jesucristo, la ko chrónkani kixin jeheni mé tjejóch'eni ixra tjinkitsani ti jahara, kixin kjaxini tinkáchónkini Ìnchéni Jesucristo.

⁶*Kixin Díos ti ó kjuích'éna chjasintajni la k'uetóan ch'an kixin ijnko xrohi ts'inkaséñaxín ti sítie la ijie kjaxin jehe ch'an kjuajon ch'an ti xrohi ts'inkaséñaxín nkaya aséni, kixin chrókjuachani chrókónoheni nkexrín itjen ti kjuachaxin ijie kuénté Díos, t'inkaséñaxín ti nkayakon Ìnchéni Jesucristo.

Nkexrín chrók'uejóni kixin tinkáchónkini Ìnchéni

⁷Ti cuerpo kuénténi la mé éxi ijnko ichi tsík'óna nchetje tjinká nkehe tjete, mé xikaha tsjakoxini kixin ti kjuachaxin ijie chónani la Díos kjuajon, jehya kuénténi.

⁸Kjónté itsjé kjuaxikaon chónani la chrók'óxrjéhyani. Kjónté imá síin kjuanínkaon la

chrókóxakuenhñani. ⁹Síin itsjé chojni nínkaon la chónkíhi sin ti jeheni, kjánchó Díos la titoéhya ti jeheni. Kjónté nchónhña nkehe k'uatsínkani kjuasótexíni, la kjuínchek'itjáñahña sin ti jeheni.

¹⁰Kjónté nketí sáchrókjuini la chrókjuasótexíni éxi kjuasóte Ìnchéni Jesús, kixin kjaxini tjakoxini ti kjuachaxin chóna ch'an kixin tjechón ch'an. ¹¹Méxra jeheni ti naxa tjejóchóni, la síin kjuaxikaon, kjánchó chrakonhani kjónté chrók'uenxíni kixin tinkáchónkini Ìnchéni kixin xikaha chrókjuakoxini ti kjuachaxin chóna ch'an, kjónté ti cuerpo chónani la chóna tsjeje. ¹²La kjónté xikaha chrók'ueni kixin kjaxinra tsochontara kjuachón nkochríxin.

¹³*Éxi ndáchro ti xroon itén Díos tsíkjin sin óse: “Kuitekaóan Díos ndá xikaha xrjanká ti itan kuénté ch'an.” Andá kjaxin jeheni kuitekaoni Díos ndá xikaha chrónkani ti itan nixin. ¹⁴Ó noheni kixin Díos, ti nkexro kjuínchexechón Ìnchéni Jesús, mé kjaxin sinchexechón ti jeheni. La nkokoa sátsjikoni ch'an ti itjen ch'an. ¹⁵Mé xikaha kaín tíha kóhen kixin jahara la jína chrók'uejoxinra. La ko kjaxin xikaha antsí itsjé chojni chrók'uáyéhe sin kaín ti nkehe jína tsajon Díos, la xikaha antsí

itsjé chojni chróchjehé sin Díos kjuasáya kixin ti kjuachaxin ijié chóntha ch'an.

¹⁶Méxra chrók'óxrjéhyani kjónté tinkákjeje ti cuerpo chóntani, kixin Díos la tinkánchenixin ti aséni nkojnko ñao. ¹⁷Andá ti nkehe tjasótexíni ti tjejóni ijie, mé tíha la tjoka ts'atsínka, la ts'áyéheni ijnko kjuachaxin imá ijié, la nkochríxín tsjak'e. ¹⁸Méxra chrókóxakuenhñani ti nkehe síin chjasintajni. Chrokjueyáni ti nkehe naxa t'ikönhñani, kixin ti nkehe t'ikoni la chóxin tsjeje. Andá ti nkehe t'ikönhñani la tsjejehya, tsjak'e nkochríxín.

5 ¹Ó noheni kixin ti cuerpo chóntani la éxi ijnko nchia síin ntihi tjoka tsjeje, kjánchó Díos mé kjuíuch'éna ijnko nchia nixin itjen nkaya nkajni ts'áyéheni, la tíha mé ts'itjáñahña, nkochríxín tsjak'e kixin jehya chojni kjuíuch'éna. ²Méxra ti naxa tjejóni ntihi chjasintajni la náxrjónhña tjejóni tjasóteni la ó tjinkaoni ti cuerpo nixin tsochóntani nkaya nkajni ³kixin ti ó ts'inkáyani ti cuerpo nixin, la í tsojtjóchínhñani. ⁴Ti naxa tjejóchóni, chóntani ti cuerpo ntihi, la kjuaxróxinhña tjejóni, kjánchó tjinkakönhñani chrókuítóhene ti cuerpo ntaxin chóntani; tjinkaoni chrókónixin tíha. Ndá í chrók'uenhñani la chrókuákjani

ti kjuachón nkochríxín. ⁵Díos mé kjuénkayáxin ch'an kixin tíhi sinchekítóhene ch'an ti jeheni, ndá kjuajon ch'an ti Nchakuén ch'an k'uáyéheni kixin chrókónoheni kixin chaxín ts'áyéheni ti íso nkehe tsjajon ch'an.

⁶Méxra nkochríxín chéheni kjónté ó noheni kixin ti naxa tjejóni ntihi, chóntani ti cuerpo, la naxa tjejókohyani ñchéni. ⁷Mé xíkaha jeheni la tinkáchónkini Díos, kjónté t'ikönhñani ch'an. ⁸Méxra jeheni la imá chéheni kixin ó tjinkaoni chrókuítóhene ti cuerpo chóntani kixin sáchrókujini ti itjen ñchéni kixin ts'ejókoni ch'an ntiha. ⁹Méxra tóxakoheni ich'eni ti nkehe tjinkaon ch'an, á naxa chóntani ti cuerpo ntihi o náhi. ¹⁰*Kixin kaíni ticháxin tsochjinani ti itjen Cristo t'etoan kixin tsitòdexín ti ijíeni, ndá nkojnkoní ts'áyéheni ti nkehe tsjajon ch'an éxi ti ixra kjuíuch'eni, á jína o náhi, ti naxa k'uéchóntani ti cuerpo chjasintajni.

Ti itan tjajon kjuaxróxin

¹¹Méxra jeheni tjinkaoni tsjikosáyehe ni ñchéni la xíkaha tóxakoheni tjakoheni íso chojni kixin chrókuinkáchónki sin ch'an; Díos la ó chóxin ti jeheni la ó nohe ch'an kixin ndóá nixjani; méxra tjinkaoni

kixin jahara chrókónohara tíhi kjaxin. ¹²Jehya tjinkaoni chróchronkani inaá kixin jína ich'eni ixra. Náhi. Ndáchroni tíha kixin chrókóchàxinra kixin jeheni la ndoá chrónkani. La xikaha tsonohara nkehe tsjatehera ti nkehe ndáchro ti sin imá nchehnke kixin imá nohe, kjánchó chaxínhña nohe. ¹³Ti ndáchro chojni kixin loconi la xikaha ichro sin kixin imá tjinkaoni chrókjuich'ehe ni Díos ixra. Andá ti náhi la jína nixjani kixin tjinkaoni chrókjuinkitsani ti jahara. ¹⁴Ínchéni Cristo la imá tjeuhe ti jeheni la jehe ch'an t'etuehen ch'an ti jeheni, kixin ó noheni jína kixin nkokoa nkexro k'uenyákoheni kaíni, la kaíni tjejóni éxi ik'uéni kjaxin. ¹⁵Mé xikaha Cristo kjuenkayákohen ti jeheni kixin jeheni ts'ejóchónxini ti jehe ch'an, la xikaha jehya chrókjuinchexiteyeheni ti nkehe tjinkaon aséni. Náhi. Chrókjuích'eni ti nkehe tjinkaon Cristo kixin jehe ch'an k'uenyákohen ch'an ti jeheni la ko xechón ch'an inaá kixin tsaáxini ch'an. ¹⁶Andá ijie la tjenkayáxinhñani nkexrín itjen ijnko chojni éxi tjenkayáxin ti chojni chjasintajni. Senó la kuék'íkoni Cristo éxi ijnko chojni chjasintajni, andá ijie la xikahña tjenkayáxini. ¹⁷Méxra ti nkexro tinkáchónki Cristo la k'óna ijnko chojni nixin; kaín ti nkehe

ntaxin la ó kjuixin k'uat sínka, andá ijie la kaín k'óna nixin.

¹⁸La kaín tíha mé ti ixra kjuích'e Díos kixin kjuajon ch'an ti kjuaxróxin la jína chrók'uejókoni ch'an kixin Cristo k'uenyákonhen ti jeheni. Andá ijie la jeheni k'uáyéheni ti ixra tsochenkani iso chojni kixin chrókjan sin chrókuitekaon sin Díos inaá.

¹⁹Noheni kixin Díos la ichr'án ti xjeen k'uenyákohen ti jeheni, ndá xikaha tjinkaon ch'an kixin kjuaxróxin chrók'uejóko ch'an ti chojni síin chjasintajni, la chrórxaxinkakonhña ch'an kaín ti ijie kjuasin sin. Andá jeheni mé k'uáyéheni ti ixra kixin tsochenkani chojni ti itán i. ²⁰Cristo ichr'án ti jeheni kixin tsonixjahára la chrónða ch'an kixin chrókuihínra ti itan tsochronkani. Méxra kjuachaxíen Cristo la tjanahára kixin kjuaxróxin chrók'uejókora Díos. ²¹Cristo kjuasinhña ninkehó ijie, kjánchó Díos k'uíkon ti jehe ch'an éxi ijnko nkexro chóna ijie, la kjuasótexín ch'an ti ijie k'uéchóntani kixin jeheni la jína la ko tjóá chrók'uejóni.

6 ¹Kaíni nkokón ch'ehe ni Díos ixra, méxra chrónðani kixin chrók'uitjáñahñara ti kjuachaxin kjuajon ch'an kixin imá tjeuhe ch'an ti jahara. ²*Éxi ndáchro ti xroon itén Díos:

Ti ó kjuixraká ti ñao
tsjínkítsa chojni la kujhan
ti nkehe kjuanchiara;
La ti ñao tsaá chojni la
kjuínkítsa ti jahara.
Andá ijie ó ikui ti ñao kjueyá
Díos, ó ikui ti ñao tsaá chojni.

**Pablo kjuasóte kixin
ch'ehe ixra Díos**

³Tjə̀oxinhñani ninkehó nkehe
nduáhya kixin chrók'uántaxièxin
chojni ti ixra tjejóch'eni. ⁴Kaín
ti ixra ich'eni la tjə̀oxini
kixin Díos ch'ehe ni ixra.
Méxra tónínkakonhñani kjónté
nchónhña nkehe tjasótexíni,
kjónté ichrén nkehe tichánxihini
la ko kjónté ichrén kjuaxikaon
síin, ⁵*kjónté k'uekoni,
k'uejóchjinani, la nchónhña
chojni kónínkakohen ti jeheni
la kjónté itsjé ixra ich'eni la
kjuachani kotáchrin la ko
kjinta. ⁶Tjə̀oxini kixin tjóá
tjejóni, la noheni ti nkehe
chaxín, tónínkakonhñani,
nkojína nixjani la tjə̀oxini kixin
chóntani Nchakuén Díos, la ko
kaín aséni tjehehni kichóni.
⁷La tjə̀oxini kixin chaxín ndoá
chrónkani ti itan kuénté Díos,
la ko chóntani ti kjuachaxin
kjuajon Díos. Ndoá tjejóch'eni
ixra kixin xikaha tsjachani
tsjajonkoni ti nkehe jínahña.
⁸Iso sin la nkojína nixjehe sin ti
jeheni la iso sin la náxrjónhña
nixja, iso sin la jína tjejóni, ichro

sin, la iso sin la t'ándaxihin sin
ti jeheni. Iso sin t'ikon ti jeheni
éxi chojni ch'ia kjónté ndoá
chrónkani. ⁹Iso sin kjónté chóxin
sin ti jeheni la ndáchro sin kixin
chónhña sin ti jeheni, la ko iso
sin tjinkaon chrók'óná ti jeheni,
kjánchó naxa tjejóchóni. Kjónté
tjate sin ti jeheni la t'ónáhña sin
ti jeheni. ¹⁰Éxi t'aváni, kjánchó
chéhni. Éxi nóani, kjánchó
chjeheni chojni ti nkehe imá
tjete. Éxi chóntahyani ninkehó,
kjánchó chóntani kaín nkehe.

¹¹Kichóni, jahara tjejora
chjasin Corinto, ndoá nixjahára
la ninkehó t'ayáhyara la kaín
aséni tjehehni ti jahara. ¹²Jeheni
la imá tjehehni ti jahara, kjánchó
jahara la tjə̀oxinhñara kixin
tjehéra ti jeheni. ¹³Xrjanoáhára
éxi ijnko it'é xjan chrónoéhe ti
xjeen kixin kjaxinra chrótjehéra
ti jeheni éxi tjeuxíni ti jahara.

**Jeheni mé ti ninué
Díos tjechón**

¹⁴Chrókónkojiéhyara ti chojni
tinkáchónkihya Inchéni, kixin
éxi ijnko yunta, ti nkokónhña
la nkokónhña ich'e va ixra.
¿Nkexrín chrókóyóhe ijnko
chojni tinkáchónki Díos la ko
ijnko chojni tinkáchónkihya
Díos? La ko, ¿nkexrín
chrókóyóhe ti t'inkaséña la ko
ti síite? ¹⁵Nkexrín chrók'uixin
kjuaxróxin ti itjen Cristo la ko ti
Jínahña. Xitjahya ts'ejóko kicho

ijnko chojni tinkáchónki Cristo la ko ijnko chojni tinkáchónkihya Cristo. ¹⁶*Xrokjuahya ts'iton ti nínkué Díos la ko ti nínko síin nkehe tsíkjanoña. Kixin jeheni mé ti nínkué Díos tjechón, éxi tsíndáchro Díos:

Janhan tsjak'é la ko ts'ájia ti tjejó sin,
janhan ts'óna ti Díos kuènté sin
la jehe sin ts'óna sin ti chjasin kuéntana.

¹⁷*La kjaxin xíkíhi ndáchro Ìnchéni:

T'axrjékjanxínra ti jehe sin la ókjé t'ejora.

Tjásinhñara ijie,
ndá janhan ts'ayáha ti jahara.

¹⁸*La janhan ts'óna It'ára,
la jahara ts'ónara xjana ndoa la ko xjana ichjin,
mé xíkaha ichro Díos chóna kaín kjuachaxin.

7 ¹Kíchóni, mé xíkaha ndáchro Díos kixin tsjajon ch'an ti nkehe jína. Méxra ticháxin tjóá chrók'uejóni, la chrókuítóheni kaín ti nkehe chrókókjítaxin ti cuerpo kuènténi la ko ti aséni. La chrókjuikosáyeheni Díos la tjóá chrók'uejóni.

Pablo imá chéhe

²Kaín asánra chrókjuájonra kjuachaxin chrókuihínra ti nkehe chróchronkani. Kixin

ninkexro kónínkakuenhñani la ko ninkexro kjuíuch'yehyani.

³Jehya ndáxrjan tíhi kixin chrók'uekara ijie. Náhí. Ó nohara ti nkehe chrónkani senó, kixin kaín aséni tjeheheni ti jahara la jína ts'ejóko kíchóni, á naxa tjejóchóni o tsík'eni. ⁴Janhan la imá tjikosáyahara la ko imá chána kixin jína tjejora. Kjónté tjejótjasóteni la imá chána janhan.

⁵*Ti ó kjujini Macedonia la xrokjuahya kók'éheni kixin nkuíxín la síin chojni nínkaon la imá kóxakohen aséni la ko chrákoni. ⁶Kjánchó Díos, ti nkexro nchechéhe asén kaín ti chojni k'óxrjé, mé kjuínchechéhe aséni ti ó kjuíji ch'in Tito.

⁷Kjánchó jehya kixin jehó kjuíji ch'in Tito ndá kóchéxin aséni. Náhí. Kjaxin chéheni kixin jahara kjuínchechéhéra ti jehe ch'an. Chrónka ch'an kixin imá tjínkaonra chrók'uíkonra ti janhan kixin imá t'avára la ko kjaxin tóxakohanra kixin ti janhan. Andá ti ó kuihan tíha, la antsí kóchána.

⁸Kjónté kjuíntak'avára intsí kixin ti xroon chr'ahánra senó, la ijie la í tóxakonahña. Sao la kóxakóna kixin kuihan kixin ti xroon la kjuíntak'avára iso ñao. ⁹Andá ijie la chána, jehya kixin ti kjuíntak'avára. Náhí. Chána kixin ti kjuat'avá la kjuínkitsa

6:16 a: 1Co. 3:16; 6:19; b: Lv. 26:12; Ez. 37:27. 6:17: Is. 52:11.

6:18: 2Sam. 7:14; 1Cr. 17:13; Is. 43:6; Jer. 31:9. 7:5: 2Co. 2:13.

ikjanra kuinkachónkira Díos. Kjuáchara k'uatsínkara ti kjuat'ává kjónté k'uává asánra kixin xíkaha kotjinkaon Díos. Méxra jehya kixin nduáhya ikjian ti xroon. ¹⁰Méxra ti kjuat'ává éxi tjinkaon Díos la tjitóxin ti nkehe tjéncayáxinra, andá xíkaha tsaára, ndá ti kjuat'ává tjajon ti chjasintajni la ts'enxín chojni. ¹¹Andá jahara kjuachara k'uatsínkara ti kjuat'ává éxi kóxríhín Díos, la ijie ó ndoá tjéncayáxinra, la t'ékahyara ijie ti janhan. Ti nkehe kuihínra kjuúntakónínkaonra la ko kjuúntachrákonra. Ndá ijie ó kjuínchekjasótera ti nkexro kjuasin ijie, la ijie tjinkáonra chrók'uúkonra ti janhan. La kaín tíha kjuákoxinra kixin jahara chontahyara ninkehó ijie ti nkehe tsíkóhen. ¹²Ti ó ikjian ti xroon chr'ahánra la jehya ikjian kixin ti nkexro kjuasin ijie, la o jehya ikjian kixin ti nkexro chónra kjuaxikaon. Náhí. Ikjian tíha kixin tjínkaon kixin chrókjuákoxinra nkayakon Díos kixin tóxakohanra sínchexiteyára ti nkehe kuétoan janhan. ¹³Andá xíkaha kjuích'era la kóchéheni.

Kjaxin antsí kóchéheni ti k'uúkonni kixin chéhe ch'in Tito kixin kjuúnkítsara kjuaxróxin kjuák'e ch'an ntiha. ¹⁴Janhan k'uétjanka ch'in Tito kixin chàna kixin ti jahara, la jehya ijnko

kjuach'ia tíha. Náhí. Kaín nkehe k'uétjónkara la chaxín la ko kjaxin kaín nkehe k'uéndátjan ch'in Tito la chaxín tíha, la chéheni kixin kuitekáonra. ¹⁵Andá ijie la Tito antsí tjuahára kixin xráxinkaon ch'an kixin jína kuitekáonra la ko kjuikosáyehéha ch'an la kjuájonra kjuachaxin kuítóhe ch'an ntiha. ¹⁶Méxra imá chàna kixin ó nona kixin jahara chaxín sínchexiteyára.

**Ti chichaon ts'áyéhe
ti sin nínkué Díos**

8 ¹*Kíchóni, tjinkaoni chrókónohara nkexrín tjejó ti sin tinkáchónki Ìnchéni tónkotsé Macedonia kixin kjuákoxin sin kixin Díos imá kjuúnkítsa ti jehe sin. ²Kixin kjónté nchónhña nkehe k'uatsínkaxín sin la chéhe sin, la kjónté nóa sin la antsí kjuúnkítsa sin íso chojni éxi chróchónra sin itsjé chichaon xíkaha. ³Janhan k'uúkuan la ko xrjanká kixin chaxín kjuajon sin éxi ti nkehe chónra sin la ko antsí itsjé xíkajon sin éxi kjuéncayáxin sin. ⁴Imá chrónòra sin kixin chrókjuajoni kjuachaxin kixin kjaxin sin chrókjuúnkítsa sin ti sin kíchóni tinkáchónki Díos. ⁵La antsí itsjé kjuajon sin ke ti kjuéncayáxin kixin chrókjuajon sin, kixin saon la kaín asén sin kuitekaon sin Díos, andá kjuínchexiteyéhe

sin ti jeheni éxi tóxríhjn Díos. ⁶Méxra chrónoéheni Tito kixin chrókjuintaxín chrókjuenájín ch'an ti chichaon tjájonra ti tónkotséra kixin jehe ch'an kjuankíxixín ch'an ti ixra a senó. ⁷Jahara la jína kjuákoxinra kixin antsí tinkachónkira Díos, antsí k'uitjára chonkaxinra ti itén Díos, antsí k'uitjára nkehe kuènté Díos, la ko antsí chontara kjuachéhe, la antsí tjuéhéra ti jeheni. Méxra ijie la antsí chrókjuákoxinra chrókjuínkítsara ti sin kíchóni.

⁸Jehya tétuahanra kixin xikaha chrókjuich'era. Náhí. Jehí tjínkaon kixin chrókónohara nkexrín jína kjuích'e ixra ti iso sin kixin kjaxinra chrókjuákoxinra kixin chaxín tjuéhéra kichuara. ⁹Ó nohara kixin Ìnchéni Jesucristo, kjónté chóna ch'an kaín nkehe, la kónóa ch'an kixin imá tjuéhe ch'an ti jeheni, la kónóa ch'an kixin jína tsochóntani kaín nkehe.

¹⁰Tjínkaon kixin jína ts'ejora, la xikaha ndáxrjan ti nkehe tjénkayáxian kuènté ti ixra i. Ti nánó k'uatsínka la jahara kjuankíxinra kjuínkítsara sin, kjuájonra nkehe, la jehya jehó kjuájonra, kjaxin imá kócháhara kjuínkítsara sin. ¹¹Andá ijie chrókjuintaxín chrókjuínkítsara la kaín asánra chrókjuájonra éxi tjachara nkojnko ñao éxi

ti xránkíxixín tsíkjatéhéra tsjínkítsara xíkaha. ¹²Mé xíkaha ti nkojín chojni chaxín tjinkaon chrókjuajon, la tsoxríhjn Díos ti tjajon sin ti nkehe chóna sin. Díos la tjanchahya ti nkehe chóntahyani.

¹³Tjínkaonhña kixin kaín nkehe tsjájonra ndá iso sin ts'ejóxin jína, ndá jahara tsochontahyara nkehe sintera. Náhí. ¹⁴Ícha jína nkóon chróchontara. Ijie jahara chontara ti nkehe chóntahya iso sin. Andá jínko ñao jehe sin tsochóna sin la tsjínkítsa sin ti jahara. Mé xíkaha tjínkítsa kichuara. ¹⁵*Éxi ndáchro ti xroon itén Díos: "Ti sin kjuenájín nchónhña la mé ninkehó xèhya, la ko ti sin kjuenájínhña itsjé, la kjónté tsjéhya la xehe iso ti nkehe kjuenájín sin."

Ti sin ichr'án Pablo

¹⁶Kjuasáye Díos kixin kjuínchexraxinkaon ti ch'in Tito kixin tóxakohen ch'an éxi tóxakonaxián janhan kixin ti jahara. ¹⁷Ndá xrjanoáhá ch'an kixin chrókjujítsjehe ch'an ti jahara la cóxríhjn ch'an, ndá kjaxin ch'an kóxakohen ch'an kixin á jína tjejora, ndá tjinkaon ch'an chrókjujítsjehe ch'an ti jahara.

¹⁸Kjaxin k'uetqan kixin tsjjikotóxin ch'in Tito, jínko kíchóni chóxin kaín nkexro

tinkáchónki ìnchéni tónkotsé nkojnko nìnko kixin ti ixra jína tjech'e ch'an kixin titekaon ch'an ti itan tsaáxini. ¹⁹ Kaín ti sin tónkotsé nìnko ntihi kjueyá sin ti nkexro a kixin sátsjikotóxìn ch'an ti jeheni ti sátsjikoni ti chichaon tsjikénheni ti sin chóntahya. La nchexiteyáni ti ixra kixin xíkaha tsjikosáyeheni Díos la ko xíkaha tsjakoxini kixin chéheni tjinkítsani ti iso sin. ²⁰ Tjinkaoni kixin tsokohya nkexro ts'ándaxín kixin nkexrín ch'exíni ixra ti chichaon xrenájín ntihi. ²¹ *Méxra tjinkaoni chrókuích'eni ndoá ti ixra i, jehya tjinkaoni kixin jehó chojni chrók'uikon kixin jína tjejóh'eni. Náhi, kjaxin Ìnchéni la tjetsjehe ch'an.

²² Kjaxin k'uetoani kixin tsjikotóxìn sin tjnko kíchóni, ijnko nkexro kjuakoxìn kixin chéhe chrókuinkítsa kixin itsjé ixra kjuích'e. Andá ijie antsí chrókuích'e ch'an ixra kixin chóxin ch'an ti jahara. ²³ Andá ch'in Tito la tjinkítsa ch'an ti janhan. La ti tsjanchankí sin nkexra ich'e ti í yaá sin kíchóni la chenkara sin kixin nìnko tjejó ntihi ichr'án ti sin a kixin tjikosáyehe sin Cristo. ²⁴ Méxra tjákoxinra kixin chaxín tjehéra kichuara kixin tsonohe ti sin kíchóni kjuíjixín iso nìnko kixin ti nkehe ndáxrjan kuéntára la chaxín ndoa.

Ti chichaon xrenájín tsjinkítsa ti sin kíchóni

9 ¹ Andá ti tjenájínra ti chichaon kixin tsjínkítsara ti sin kíchóni tinkáchónki Díos, la ticháxinhña tsokjian ijnko xroon tsoxrjanka kuénté tíha, ² kixin ó nona kixin tjinkáonra tsjínkítsara sin, la xíkaha chàna tjanka ti sin tjejó Macedonia kixin jahara, chojni Acaya, ndesi ti nánó k'uatsínka la xráxín tjinkáonra chrókuinkítsara sin. Andá ijie antsí itsjé ti sin Macedonia tjinkaon tsjinkítsa sin kjaxin kixin xíkaha kjuákoxinra jahara. ³ La xíkaha ichr'án ti sin kíchóni kixin tjínkaon kixin jehya chónkó ti ixra a. Méxra jahara la tóxakohanra tjenájínra ti chichaon kixin chéhe asená kixin xíkaha tsíndáchrora tsjínkítsara. ⁴ Jehya kixin ti ó chrókuasánkian iso ti sin Macedonia ndá chrók'uikon sin kixin naxa kjuénájinhñara ti chichaon tsjájónra, ndá chrókósuàna kixin k'uéndáxrjan kixin jína ich'era ixra, la kjá kjaxinra chrókósuàhara ti xíkaha kixin chaxinhña tóxakohanra tjenájínra ti chichaon. ⁵ Méxra kjuénkayáxian kixin ícha jína tsondátjan ti sin kíchóni kixin ts'itónxin sin ntja tsjiji sin, tsjijitsjehe sin ti jahara la ko tsjinkítsa sin tsjenájín sin ti chichaon tsíndáchrora tsjájónra.

Ndá xikaha jína chrókjuájonra ti chichaon éxi ijnko nkehe chaxín tjínkaonra tsjájonra, jehya éxi ijnko nkehe tjáncháhára.

Chrókéchéheni chrókjuajoni

⁶Xráxinkaonra tíhi: Kixin ti nkexro k'uęnkahya itsjé la tsjéhya tsotjá; andá ti nkexro itsjé k'uęnká la itsjé tsotjá. ⁷Méxra nkojnko chojni chrókjuajon éxi ti ndáchro asén, jehya chrókjuékohen sin o ticháxin tsjajon sin. Náhí, kixin Díos la tjehe ti nkexro kaín asén tsjajon. ⁸Díos la chóna kaín kjuachaxin la tsotjáhara kaín ti nkehe ticháxihanra kixin tsochontara la tsjachara tsjínkĩtsara iso ti sin chóntahya. ⁹*Éxi ndáchro ti xroon itén Díos:

Ti nkexro kaín asén
nchekitonhen ti sin nóa
la nkochríxin tsoxraxinkaon
chojni ti ixra jína kjuích'e
sin.

¹⁰*Díos tjajon noatje kixin ts'inka la ko tjajon nkehe sinieni, la kjaxin Díos tsotjáhara kaín ti nkehe ticháxihanra la ko sinchetsjé ch'an ti nkehe chontara kixin jína tsjínkĩtsara ti sin chóntahya. ¹¹Ndá xikaha tsochontara kaín nkehe la antsí tsjachara tsjínkĩtsara kaín asánra ti sin chóntahya. Andá xikaha itsjé sin tsochjéhe sin Díos kjuasáya kixin jahara kjuínkĩtsara ti jehé sin kixin ti

chichaon kjuéjora kjuikaáni, kuákja sin. ¹²Kixin xikaha chrókjuínkĩtsara ti sin kíchóni la jehya kixin chrók'uáyéhe sin ti nkehe tichánxihin sin ó, kjaxin antsí chróchjéhe sin Díos kjuasáya. ¹³Andá jehé sin la tsjikosáyehe sin Díos kixin kjuákoxinra kixin chaxín nchexiteyára ti itan nixin kuenté Cristo kixin ti nkehe kjuájonra, la kjaxin jehé sin tsjikosáyehe sin Díos kixin kaín asánra kjuínkĩtsara ti jehé sin. ¹⁴La ko jehé sin tsjanchehe sin Díos kixin tsjínkĩtsa ti jahara kixin jehé sin tjuahára sin kixin t'ikon sin kixin tjákoxinra kixin imá jína Díos la ko imá tjehe ch'an kaín chojni. ¹⁵Kjuasáye Díos kixin kjuajon ch'an ijnko nkehe imá tjehe kuitonheni tsaáxini, la chóntahyani nkexrin chróchjéxini ch'an kjuasáya.

Ti kjuachaxin chóna Pablo kixin k'óna apóstol

10 ¹Janhan, Pablo, xrjanoáhára la ko nkojína nixjahára la tjínkaon tsjákoxian kixin tjuahára éxi tjuahára Cristo. Iso chojni ndáchro sin kixin ti ó itjén ti tjejora la chrákuan, andá ti ikjín itjén la imá jiána, ichro sin. ²Méxra xrjanoáhára kixin ti ó tsjasantsjahára la jína chrók'uejora kixin ndá ticháxinhña tsojiana. Isora

tékarani ijie la ndáchrora kixin tjákoxián éxi chojni chjasintajni ó. Andá ti xikaha ichrora la ti ó tsjasán janhan ticháxin tsojiana kixin tsjénuáhara. ³Chaxín jeheni la chojni chjasintajni ntiho, kjánchó ti ó tjajonkoni ti Jínahña la tjajonhñani éxi tjajon chojni chjasintajni tinkáchónkihiya Díos. ⁴Kixin ti chika tjajonkoxini la jehya éxi ti chika tjajonxin chojni ntihi chjasintajni. La náhi. Kjuachaxin kuènté Díos tjajonxini la tíha tsjacha sinchek'itjáña kaín kjuachaxin kuènté ti Jínahña. ⁵La tsjachani sinchek'itjáña ti nkehe nduáhya tjenkayáxin chojni la ko kaín nkehe nchenkexín sin kixin tíhi mé t'inkákonhen kixin chrókuinkáchónki sin Díos. Andá kjuachaxin kuènté Cristo la kaín nkehe nduáhya tjenkayáxin chojni chjasintajni tsítóeheni Cristo kixin jehe ch'an sinchek'itjáña ch'an tíha kixin jína chrókuitekaon chojni ti jehe ch'an. ⁶La ko tjejóchóheni sinchekjasóteni kaín ti sin naxa tjinkakonhña chrókuinchexiteyá, ti ó tsjákoxinra jahara kixin chaxín nchexiteyára jína. ⁷Andá jahara la titekáonra ti nkehe t'ikonra ó. Andá ti nkexro tjenkayáxin kixin chaxín ch'ehe Cristo ixra la kjáxin chrókjuatsoan kixin kjáxini ch'eheni Cristo ixra. ⁸Méxra ti chrókjuintahnke kixin ti

kjuachaxin chonta janhan ndá chrókósuànahña kixin Ìnchéni kjuajon ti kjuachaxin kixin chrókjuinkitsa ti jahara kixin antsí chrók'uitjára kuènté Díos, la tíha la jehya kixin chrók'uitjáñaxinra. ⁹Tjínkakhñña chrókjuintachrakonxinra kixin ti xroon chr'ahánra. ¹⁰Kixin ndáchró sin kixin jiehe ti nkehe ikjian, andá ti chrókjuak'é ntiha la jiahya janhan la ko kanhño chóna kjuachaxin ti níxja. ¹¹Kjánchó ti sin xikaha ndáchró la chrókónohe sin kixin nokón níxja janhan éxi níxja ti xroon tsíkjian ti ikjín itjén, la xikaha chrónixja ti ó tsjak'é ntiha. ¹²Tjinkakonhñani chrókjuénkayáxini kixin chrókóyóheni ti íso sin níxja sin kixin jína sin. Jehe sin mé lontí sin kixin ncheyóexin asén sin éxi íso chojni. ¹³Andá jeheni la chrókjuinchenkexínhñani ijnko ixra jehya kuènténi. Díos mé kjuako nketí sich'eni ixra la kjáxin kjuajon ch'an kjuachaxin kixin kjuíjini kjuích'eni ixra ti tjejora chjasin Corinto. ¹⁴Jehya kixin chróchóntahyani kjuachaxin chrók'uetqani. Ti chaxín jehya jeheni saoni kjuíjini ti tjejora, ndá xikaha chróchóntahyani kjuachaxin chrónixjahára, kjánchó jeheni saoni kjuíjini ntiha kjuákohára ti itan kuènté Cristo. ¹⁵La chrókjuinchenkexínhñani ijnko ixra kjuích'e ókjé chojni éxi

ixra chrókjuích'eni jeheni. Náhí. Tjinkaoni kixin antsi chrók'uitjára tsinkachónkira Ìnchéni, ndá xíkaha antsi chrókjuinkitsani ti jahara, kjánchó tjinkaoni jehó ti ixra k'uáyéheni sich'eni. ¹⁶Kjaxin tjinkaoni chrókjuakoni ti itén Ìnchéni chrókuaáxin chojni íso chjasin ikjín, kjánchó chrókjuinchenkexinhñani ti ixra kjuích'e ókjé chojni.

¹⁷*Ti nkojín nkexro tjinkaon chrókjuinchenke la jehó chrókjuinchenke kixin tinkáchónki Ìnchéni. ¹⁸Kixin tóxrìenhña Díos ijnko nkexro jehó chróndáchro kixin jína. Náhí. Ìnchéni mé tsondáchro nkexro ti chaxín jína.

**Pablo la ko ti sin
chaxínhña apóstol**

11 ¹Tjínkaon kixin chrókjuachara chrókuihínra kjónté ti ó chrónixja jnko nkehe éxi lontí. ²Janhan tjínkaonhña kixin ijnko nkexro chrókuinkachónkira; jehó Cristo. Kjaxin xíkaha tjínkakonhña Díos. Xrjanoáha Cristo kixin chrók'uáyéhe ti jahara kixin tjínkaon chrókjuánjua ti jahara éxi ijnko tjarisoá tsotéhe nkoqoa xìi xíkaha. ³*Kjánchó tóxakona kixin tsohanra éxi tjan Eva kixin ti konche kjuích'iyehé ti jehe tjan. La xíkaha kjaxin

chrókuítóéhyara sit'ayahara ókjé chojni kixin chrókuítóhéra Cristo. ⁴Mé xíkaha jahara xrahya tjájonra kjuachaxin tjiji ókjé chojni ntiha chrónkaxín sin ijnko Jesús ókjé, jehya éxi ti chrónkaxíni la ko kjaxin xrahya titekáonra ókjé nchaquén nkexro, jehya ti Nchaquén Díos k'uayéhéra saoxín, la ko xrahya chrókuitekáonra ijnko itan ókjé chrókuaáxinra, jehya éxi ti itan chaxín kuitekáonra senó.

⁵Ti sin chréhéra la ndáchro sin kixin imá tjetooan sin, andá janhan la kanhño tjetooan, ichro sin, kjánchó janhan la ó nona kixin chaxínhña tíha. ⁶Kjónté kanhño náxrjón níxja janhan la jehya kixin kanhño chrókónona chrókjuakua ti itan chaxín. Mé xíkaha tjákoxián itsjé kixin ts'ikonra la tsonohara jína.

⁷¿Á nduáhya kjuít'a ti ó xrjankaxián ti itan tsaáxini ní?, kixin ninkehó kjuanchahyara chrókjuácha, la ko éxi ijnko chojni nóa kjuak'é kixin tjínkaon chrókjuinkitsa ti jahara kixin jína chrók'uitjára. ⁸Ti sin íso njnko kjuínkitsa sin ti janhan, kjuajon sin chichaon k'uayáha kixin tsjak'é tsjákohára. ⁹*Ti kjuak'é ti tjejora, la kjónté t'itjáña nkehe, la ninkexró kjuanchàhya nkehe. Ti sin kíchóni kjuixín Macedonia mé kjuikao sin ti nkehe ticháxina. Méxra tjínkaonhña kixin

chrótjahára ixra la ko xikaha tjét'a ijie. ¹⁰Chaxín choxián ti itan chaxín ndoá kuènté Cristo, ndá kohya ninkexró nkuíxín Acaya tsjacha tsakítsjéna ti kjuachéhe chonta. ¹¹¿Nkekuènté xikaha ndáxrjan? ¿Á xikaha ndáxrjan kixin chaxínhña tjuahára ní? Náhí. Díos la ó nohe kixin imá tjuahára.

¹²Méxra tsjintaxín xikaha sít'a kixin tjínkakhñña tsjánjua kjuachaxin kixin nchenkexín ti sin ixri ndáchro kixin nkokón kjuachaxin chóna sin éxi chonta janhan. ¹³Jehe sin mé ijnko apóstol chaxínhña, ch'ia sin, ncheyóexin asén sin éxi chojni kjueyá Cristo. ¹⁴Tíhi la jehya ijnko kjuaxikaon kixin ti Jínahña la tjinkaon sincheyóhe ts'óna éxi ijnko ángel kuènté t'inkaséña. ¹⁵La xikaha kjaxin ti sin ch'ehe ixra ti Jínahña mé xikaha ich'e éxi jnko nkexro jína. Kjánchó ti ó tsjixixín la tsjasóte sin kixin ti ixra jínahña kjuích'e sin.

**Kjuasóte Pablo kixin ti
ixra kjuích'e ch'an**

¹⁶Ndáxrjan inaá kixin nijnkora chrókjuénkayáxinra kixin locua janhan. Kjánchó ti xikaha tjénkayáxinra la títóhéra tsonixja éxi ijnko chojni loco kixin kjaxin janhan jína chrókjuíntahnke intsí. ¹⁷Ti xikaha ntankexián la jehya kjuachaxin kuènté Ìnchéni ndáxrjanxian tíha. Náhí. Éxi

ijnko chojni loco níxja janhan.

¹⁸Méxra ti nchónhña chojni sín nchenkexín sin ti nkehe nohe sin, andá ijie la kjaxin janhan sintahnke ¹⁹kixin jahara ndáchrora kixin imá nohara ndá cháhara tjejó ti sin loco ²⁰la tjájonra kjuachaxin t'etuanhanra sin la ko takítsjahara sin ti nkehe chontara la ko ch'éna asén sin éxi Ìnché sin ti jahara, andá tjikosayéhya sin ti jahara la ko chjéhe sin nkaya konra. ²¹Kjónté chrókósuàna tsondáxrjan kixin janhan la kanhño kuétōan.

Kjánchó ti nkehe nchenkexín sin la janhan jína ntankexián kjaxin, kjónté ndáxrjan tíhi éxi ijnko chojni loco. ²²¿Á chojni hebreo ti jehe sin ní? Janhan kjaxin. ¿Á chojni israelita sin ní? Kjaxin janhan. ¿Á k'uaxrjeníxin sin Abraham ní? Kjaxin janhan k'uaxrjeníxian Abraham. ²³*¿Á ch'ehe sin ixra Cristo ní? Janhan la antsí t'ahā ch'an ixra ke jehe sin. Kjónté ndáxrjan tíhi éxi ijnko chojni loco. Janhan la antsí kjuít'ahā ixra Cristo, antsí itsjé kjuak'échjina, itsjé kjuínchekjasóte chojni ti janhan, la ko itsjé sin tjinkaon chrók'ónā ti janhan. ²⁴*Ti sin judío in'ó vece k'óka sin treinta y nueve látigo. ²⁵*Iní vece kjuatexína sin ti janhan inta vara la ijnko ñao kjuak'e sin ixro. Iní vece k'uaniánkikjan ntabarco inta, la ijnko ñao

la ko ijnko tie tjénkatoaón ìnta. ²⁶*K'uájia ikjín, itsjé kjuaxikaon kixin chrók'uenxian ndarío, la chrók'ónána xíchee, chrók'ónána ti sin chjasená la ko ti sin tsfkjixin ókjé. K'ufkuān kjuaxikaon ti chjasin ijie la ko ti nteje, ti ndañoa, la ko ti sin chaxínhña tinkáchónki Ìnchéni chrók'óná sin ti janhan.

²⁷K'óxrjéna kixin ti ixra la ko itsjé nkehe náxrjónhña kóna. Itsjé tie kjuak'échrinhña, itsjé ñao kjuak'éxian kjinta la ko ìnta la ko itsjé ñao kjoniehña ninkehó, imá k'uatsínka ikin kixin chontahya ika ts'itsa.

²⁸Mé xikaha kaín tíha kóhen la ko íso nkehe kóna la ko kjaxin nkojnko ñao tóxakona kixin kaín ti sin tjejó kaín ti nínko.

²⁹Ti nkojinra níhara la kjaxin janhan nína. Andá ti nkojín nkexro tjachróe kícho tjasin ijie la janhan la tónínkəoan kixin tjinkəonhña tíha. ³⁰Ti ticháxin chrókjuíntankexián nkehe la ndáxrjan kaín ti kjuaxikaon k'uátsínkaxián, kixin tíha mé tjəoxin kixin kanhño chonta fuerza. ³¹Díos, It'é Ìnchéni Jesucristo, mé ti nkexro chrórxaxinkaoni nkochrín, nohe ch'an kixin kaín ti nkehe ndáxrjan la chaxín.

³²*Ti kjuak'é Damasco, la ti gobernador kjuich'ehe ixra ti rey Aretas, mé k'uetuehen ti soldado kixin tsochóhen sin

ndója ti chjasin kixin tsotséna sin kixin tsjak'échjina, ³³kjánchó siín nkexro kjuinkajinxina ti tjat'o tsíkəntatjen ti chjasin, kjuak'enkaya ijnko ntaxra, ndá kuakitsjexína sin ijnko ventana ndá xikaha kjuínchekaá sin ti janhan.

Ti nkehe k'uíkon Pablo

12 ¹Ninkehó sínkíhya ti síntankexián ti ixra kjuít'a. Kjánchó tsoxrjanka ti nkehe k'uíkuān la ko ti nkehe kjuínchenona Ìnchéni. ²Choxián ijnko nkexro tinkáchónki Cristo, la ó k'uatsínka catorce nánó sátsíkji ch'an nkaya nkajní la ikjan ch'an, andá nonahña á sátsíkjiko ch'an ti cuerpo kuènté ch'an o náhí. Jehó Díos la nohe tíha. ³La choxián ti nkexro a, kjánchó nonahña á koí ti cuerpo kuènté ch'an sátsíkjiko ch'an o náhí. Jehó Díos mé nohe tíha. ⁴Jehó nona kixin sátsíkji ch'an nkajní. La kuíhin ch'an nkehe nixja Díos, kohya kjuachaxin nijnko chojni tsochronka. ⁵Jína chrókjuíntankexián kixin choxián ti nkexro xikaha kóhen. Kjánchó xrokjuahya chrókjuíntahnke kixin janhan imá nona. Ícha jína chrókjuákokoxian kixin ti janhuán la chontahya ninkehó kjuachaxin. ⁶Andá ti chrókjuíntankexián ti nkehe kóna la jehya ijnko kjualóko

tíha, kixin chaxín ti nkehe chróxrjanka. Kjánchó sɨntahnkehya kixin tjínkəkonhña kixin chrókjuénkəyáxin chojni kixin əntsí jína janhan. Náhí. Tjínkəoan kixin ti ixrə t'ikon sin la ko ti nkehe tihin sin mé tsjenkəyáxixín sin á jína ti janhan ɔ náhí.

⁷Imá náxrjón ti nkehe k'uúkuən, méxrə xránjon kjuachaxin kixin k'uayáha ijnko kjuatjoté éxi ijnko ich'i kjuiáte ti cuerpo kuéntəna kixin chrókjuıntankexinhña ti nkehe k'uúkuən, la tíha mé ti nkehe ich'rán ti Jínahña ikui nchekjasótena. ⁸La inf vece xrjanoáhá Inchéni kixin chrókjuatsiin ch'an ti kjuatjoté chonta, ⁹kjánchó ndáchro Inchéni kixin jehó ti kjuachaxin kuénté ch'an mé chrókuichánxina, kixin ti kjuachaxin kuénté ch'an mé əntsí tjəkoxin ti chojni fuertehya. Méxrə chəna kixin fuertehyana kixin xikaha əntsí ts'ayáha ti kjuachaxin kuénté Cristo. ¹⁰Méxrə chəna kjónté fuertehyana, kjónté t'ándaxina chojni, kjónté ticháxina nkehe, kjónté chónkíhi sin chrók'ónána sin, la ko kjónté chrókjuasótexian kixin tinkachónkia Cristo. Chəna kixin ti fuertehyana la əntsí tsochonta ti kjuachaxin kuénté Cristo.

**Tóxakohen Pablo kixin ti
sin tjejó ninko Corinto**

¹¹Kjá locona, ichrora. Kjánchó xikaha níxa kixin jahara

la kuitekákonhñara. Jahara chróchronkara kixin jína tjəkua. Jehya kixin kanhño tjeoana, landá ti sin chréhəra la əntsí tjeoan sin. Náhí. Kjónté chaxín janhan la ninkehó sínkíhyana.

¹²Kjuásian itsjé kjuaxroan ijie la jína kjuak'é kónínkəkonhña mé xikaha kjuákoxián kixin chaxín janhan ijnko nkexro tsíkjeýá Inchéni. ¹³¿Xá ndáxrjan kixin kanhño sínkíra, ke ti iso ninko ní? Kjá ti nkehe k'uitjána kjuít'ahya, la kjuanchahyara kixin tsjínkítsara ti janhan. Andá ti nduáhya kjuít'a la tónínkəkəkonhñara.

¹⁴Andá ijie ó yaxina kixin ó tíhi ti níxin vece tsjasəntsjahára la tjáncháhyara ninkehó chichaon. Janhan la tjéyáhya ti nkehe chontara. Náhí. Ti nkehe tjéyá la mé jahara kixin jahara la t'íkuən éxi xjana xikaha kixin éxi ijnko it'é xjan la tjenájín chichaon kixin tsjinkítsa ti xjeen. Jehya ti ixjan tjenájín chichaon kixin tsjinkítsa ti it'é, náhí.

¹⁵Janhan, kjónté sɨntakjeje kaín ti nkehe chonta la ko kjónté chrók'uənxián ti ixrə kixin jína chrók'uejora. Janhan la imá tjuahára, kjánchó jahara la kanhño tjeuhəra ti janhan.

¹⁶Janhan la tjaáhyara ninkehó ixrə, kjónté nkojín sin tsondáchro sin kixin kjuít'ayahara. ¹⁷¿Xá kjuít'ayahara ti nkojín nkexro ich'rán kjuíjitsjehe sin ti jahara ní?

¹⁸Ti ó kjuáncháha Tito kixin

tsjijitsjehe ti jahara la ko kjaxin ti ijnko kichóni kjuújikotóxin ch'an, la, ¿á kjuít'ayahara ti ch'in Tito, ní? ¿Á chaxínhña kixin janhan la ko Tito la jína k'uéjoni kixin nkokón Nchakuén Díos chóntani ní?

¹⁹ ¿Á tjénkayáxinra kixin xikaha nixjani kixin chóntani ijje ní? Náhí. Díos la tjetsjehe kixin nixjani éxi ijnko chojni tinkáchónki Cristo. Kichóni, tjuahára, la kaín tíha ndáxrjan kixin tjínkaon kixin antsí chrókuinkachónkira Inchéni Cristo. ²⁰ Tóxakona kixin ti ó tsjasántsahára la tsóxrínahña nkexrín tjejora la ko kjaxinra tsóxríanhñara ti nkehe tsonixja. Tóxakona kixin ti ó tsjasán la naxa sífn kjuanínkaon, naxa sífn kjuachjinoxíhin, naxa ninkákohénra kichuara, naxa chrókuétoanra jahóra, naxa tinkachónkira kjuach'ia, naxa t'ándaxíhñra kichuara, naxa chontara kjuahnke la ko nkokohya tjénkayáxinra. ²¹ Tóxakona kixin ti ó tsjasántsahára inaá la ti Díos kuéntana la sinchesuéhe ch'an ti janhan kixin ti jahara, landá tsotsjanka kixin itsjéra la naxa títóéhyara ti ijje tsíkjasinra, naxa chontara chojnichjin ókjé jehya ichjíanra la ko naxa títóéhyara kaín ti iso nkehe jínahña k'uékjich'era.



© 1996 David C. Cook

*Pablo ikjin xroon
(2Co. 13:1)*

**Pablo nchexraxinkaon sin
kixin tsjiji ch'an inaá**

13 ¹*Tíhi ti níxin vez tsjasántsahára. La kaín ti nkehe tsoyóxin la tsicháxin ts'ejó yaá o iy'á sin éxi ichro ti xroon itén Díos kixin tsochronka sin nkehe nduáhya sífn kixin tsoyóxin. ² Nixjahá ti sin tsíkjasin ijje ósé, la ko nixjahára kaínra, kjónté ikjín itjén la inaá nixjahára éxi níxja ti yaáxin vez kjuasántsahára, kixin ti ó tsjasán la í tsikonohña ti nkexro kjuasin ijje inaá. ³ Xikaha níxja kixin jahara tjínkaonra tsinhínra á chaxín níxjaxian kjuachaxin kuénté Cristo. La jehya kixin chrókjuachahya Cristo tsjakoxin ti kjuachaxin kuénté ch'an ti tjejora. Náhí. Chaxín tjakoxin Cristo ti kjuachaxin chóna ti tjejora. ⁴ Chaxín ti ik'uén Cristo kjuák'enkáni

ti ntacruz la éxi chóntahya kjuachaxin, kjánchó ijie la Cristo tjechónxin ti kjuachaxin kuènté Díos. La xikaha kjaxini éxi k'uéchóntahyani kjuachaxin, landá ijie ti ó tinkáchónkini Cristo la tjejóchónxini ti kjuachaxin kuènté ch'an kixin jína tsjinkítsani ti jahara kjaxin.

⁵Jahara chrókjuénkayáxinra á nchoxon tjejora, á kaín asánra tinkachónkira Ìnchéni. ¿Á noahñara kixin tjejokoara Jesucristo ní? Andá ti xikaha la jahara tsonohara á chaxín tinkachónkira ch'an o náhí.

⁶Méxra tjínkaosan chrókónohara kixin jeheni la chojni chaxín tinkáchónki Ìnchéni. ⁷La ko nixjeheni Díos kixin ninkehó nkehe nduáhya chrókjuich'era. Jehya kixin chrókjuakoxini kixin jína ti nkehe ndáchroni. Náhí. Tjinkaoni kixin jahara chrókjuich'era ti nkehe jína, kjónté tsondáchro sin kixin nduáhya ti nkehe tjakoni.

⁸La ninkehó nkehe xrokjuahya sich'eni kixin ts'itjáñaxín ti nkehe chaxín. Náhí. Kaín nkehe ich'eni la tjikosayéxini ti nkehe chaxín. ⁹Méxra chéheni, kjónté

kanhñó fuerteni, ti chaxín jína tjejora, la naxa tsonixjeheni Díos kixin antsí ndoá ts'ejora.

¹⁰Mé xikaha senó ikjian tíhi, ti naxa tjasántsjahyara, kixin ti ó tsjasán la í tsicháxinhña naxa sintakoninkáonra, kixin tsonixjaxian ti kjuachaxin kjuajon Ìnchéni la jehya kixin chrókjuintak'itjáñara. Náhí. Kjuajon ch'an tíha kixin jahara antsí chrókuitekáonra ti jehe ch'an.

Kjuixixín nixja Pablo

¹¹Kíchóni, chrókócháhara, la chrókjuéyára kixin jína chrók'uejora. Nkokoa chrókjuénkayáxinra la ko kjuaxróxin chrók'uejora kixin Díos la imá tjuahára la ko tjáhara ch'an kjuaxróxin mé xikaha tjejokora ch'an.

¹²Nkojína nixjehéra kichuara la ko nchónhña kjuasàya tsehéra itja kichuara. ¹³Kaín ti sin tinkáchónki Ìnchéni tjejó ntihi la xráxinkaon sin ti jahara.

¹⁴Ìnchéni Jesucristo mé sintañaora, kixin tjuahára Díos la ko tjejokoara ti Nchakuén ch'an. Ótjen.